

四庫全書

集部

欽定四庫全書

集部

見素續集

卷十一  
附錄下

詳校官中書臣賈鏞

中書臣劉源溥覆勘

覆校官中書臣汪學金

校對官助教臣蔡鎮

謄錄監生臣何照鄰

欽定四庫全書卷

見素續集卷十一

明 林俊 撰

祭文雜著

祭文安公文

嘉靖紀元正月八日族子某老過我文安公之鄉不及  
洗盃酒宿土固有餘心也遺子某載奉香幣小饌告以  
文曰方前峻極大江作對儲英發祥公應其會其所以

截然粹然又汪汪然即若親望之而無其際以睽屬諸  
山馴衆水而入之於海以參育造化涵煦日星元老三  
朝而典刑一世者斯誰之力歟維福孔皆維壽多有渥  
恩疊稠存歿誰石某垂老斯出行李公鄉不及拜床下  
顏接如往日而絮酒薄分亦違焉幽明兩心如斯而已  
耶

祭上宰王海日公

嘉靖紀元春仲見素子林某道杭方修問於我上宰新

建伯海曰公或告曰厭世矣於邑不自勝者累日病不能赴也走价以奠曰嗚呼物理忌完世界恒闕王自晉與謝相後先福履之盛古今一時矣孰不有母公母太夫人彌百其壽公褒然舉首歷上宰長謝十餘年時望八矣令子都憲公陽明擒王功世其伯爵玉帶麟袍丹書鐵券書生之極也公載際聖明載被存問載見陽明晉司馬叅留務伯封四世皆數月事又人臣之極也當時右軍殆未識此委盡以留餘造化身有餘榮朝有餘

眷而人有餘思所謂無遺憾者非公誰邪某忝通家道  
義薰炙悵舊德以永違拜遺容其無日嗚呼哀哉尚饗  
祭曹定菴

先生淵默渾粹內具衆美而外落其芒繩引故步述作  
巨工詩律唐響晉格無累無憂迺夷迺白後収先  
老官一生歷其幾何哉一貧孤守典刑來進而型治鄉  
國泰山喬嶽固有所運用其間而九十告盡亦世之所  
恒少也當時完人蘭有楓山公松有公公益居以晦嘉

靖聖天子尊異老成楓山公有晉秩存問之典公闕焉  
予吊楓山公又吊公道迂而寄空言噫已矣夫其如何

祭邵二泉母

信誑者道變化者易乾施坤承剛柔允職孰升而困迨  
剝而復孰是艱貞豫有繁福烈烈淑人於彼共姜卵葆  
乳育有鳳翱翔有蹲於池有止於棘九苞高梧於邵有  
奕綸書疊復緝典載申襄母賢母亦乃淑人兒者猶書  
母耄猶績言侍百年母乃斯寂故衣手蹟在紙遺儀黑

風寒夜烏聲酸悲某忝尚書道義胸臆節哀附勤洒馬  
以泣嗚呼哀哉尚饗

祭太保劉文和公

惟公嶽氣星精人豪天挺奮意命詞蘓黃輩等人文翊  
贊弘闡大猷總方開德滋至天休內修外防默主遙中  
帝曰師臣改容目送妖僧孽寺售術貢邪肆興土木道  
路咨嗟不揆躁狂虎口餵肉宸怒上千萬頭俱縮詔獄  
斯下公取獨爭且讀且賀天皇聖明鬼錄惟伍已乃薄

謫嗥犬狺狺我公為敵星象示變倡開直言謹詞正論  
威焰為吞維時渠奸魂膽喪失黨附橫從詆公益力碧  
山不負造物胡尤天空鳥倦某水某邱孝皇出宸有虛  
前席安車來迎逝馬以息立孤寡和知己為難春明門  
外海濶天寬白馬素車疇昔蘊結宿草一章愁腸割裂  
尚饗

祭尚總鎮

嘉靖乙酉春三月八日大總鎮達齋尚公訃至良賤猶

疑又至見素子林某曰已矣已矣如閩何異日具酒饌  
香帛遙奠公靈次告以文曰嗚呼若古親臣史游効益  
鄭衆樹庸迨我國朝懷陳麥鄧蓋已中外並躋矣公在  
吾閩鎮靜闡爽禮者賢而下寒畯屬無格外之需而人  
以無擾若亡有公者山之顛海之涯雲樵雨釣田食而  
井飲伊誰之力歟閩人德公生欲留死欲祀又冀夫繼  
者肖公聲音笑貌然哉某晦處寡合且去會城遠顧辱  
存念一介之使時及吾門無謂之作必龔巖高度至入

之於綺間揮金以贄吾匱義固弗拜而意良獨領公知  
我矣候問之使方遣中路訃還強疾授詞辨香走奠噫  
其何情其何情

祭竹田翁文

嗚呼陰陽晝夜存殆誰記感服氣以乞靈徒招尤而取  
忌慨聖儒之既遠曾神仙之足異快一寂其大歸疾於  
我其猶寄繫今之交如鬼如魅公誠不欺終畢無二慘  
右門以中落待時來其藏器才猷並施韜畧該備慕偃

儂以循墻忽澄清而攬轡授鉞東師代謀用智鋤惡奠  
良植仁運義百粵奏其膚公九仙挹其遥致結社會於  
耆流割義田於惠施落日揭其新銘青山縣其老泪亟  
巨卿以候期儼壺公於縮地豈不几筵末疾為崇嗚呼  
紙短詞長香幣遠使生卒交遊衰落文字寓公後於本  
懷衍雲來於千嗣嗚呼哀哉尚饗

告壺山

予召命將至山見卿雲北赴之旦雷雨大作甫霽四

山皆雲獨壺見真面淨碧如洗白雲布其下如座久之雲消日出光燭天人以為異

地紀山經宣播羣有某固無敢獨附而後貞有卜實山為隣固有默孚而真會者吾老分雲允若神授而祥靈現示俾老而出出而還竊有舒卷今惟與靈俱靜以頤養天和會歸皇極謹告

雜著

別家留教

名家子植立尤難須常念天地祖宗生我不可負日月  
鬼神臨我不可欺大聖大賢大儒提警我不可違收  
心養性立志務學一天理上做去久之自有受用事  
但無不可對人言及對人無愧便近道適與弟姪輩戒  
之

題志哀

志哀志方大夫豪母潘潛懿舒梓溪筆也其紀多事常  
道不易常也易坤安貞吉順承天施家人利女貞正於

內也列傳所書多女婦節為異殆不幸異爾君子寧書其常不願書其異

鷹化說

鷹鷲鳥也性善擊羣鳥伏焉既鳩化猶鷹以臨羣鳥鳥力雄素不能鷹下乘其化薄之鳩狼狽伏叢棘間以免乃嘆曰吾昔而鷹雄氣健翮爪觜利耳矣茲鳩也力顧烏乎後而襲鷹之故自取也嗚呼今之人失鷹之時而襲鷹之故有不是鳩者乎作鷹化說

方棠陵先世遺像跋

主木為之墓以藏魄廟以棲神主以系之依獸也繪形以自志豐衰之候孝子順孫因之有感有勸有惜致濟美自身之微爾矣子程子之論太嚴蓋恐墮神圖象設之二氏以立教也先世遺容士大夫多尚之子亦尚之方思道豪亦尚之夫得之尊祀者專之想像者親古有事奉木主以行以代王者便禮有義起方氏之先有所感有所勸無所惜像尤宜宜故書

跋沈休翁教子詩

休翁予道義厚平生得手劄特多為好事取去百一二  
存爾矣近得翁教子篇于仲氏華甫閱之數過交遊翁  
不可作對詞翰如復見翁我之失無能無重華甫之得  
也與不能舉其詞失其簡異矣華甫告予別方暈發強  
而書此冀永翁子傳也

跋武定侯所藏東所詞翰

右吾友張東所詞翰為太保武定公東泉作也其意氣

橫放格調清越詩始學唐竟白沙乎歸要亦河汾董常  
而枯茅神怪重不可辯如千年古木皮葉剝脫孤枯老  
榦屹以存斯公之名當時動海外無一日朝班者古謂  
書心畫可以觀人并公出處見矣抑公卿不下士東泉  
缺 東所逮之今未忘亦具知其趣矣

恭跋太祖高皇帝宸翰

郭氏駙馬都尉公鎮尚高皇帝永嘉大長公主主生珍  
親軍指揮贈武定侯也抱以見上親書乳名虺能賜之

虺蛇屬能有力獸黃熊也豈詩如熊羆虺蛇之義抑有  
以得其才傑命蹇之微未可知也古御書以賜臣下如  
唐太宗李靖詔書皆手墨又有馬周飛白之賜歐陽公  
記宋仁宗賜羣臣飛白曰賜書所在榮光燭天今魏沐  
蹇夏諸舊家多累朝宸翰御書大字則揚萬里誠齋范  
至能石湖未有親書乳名賜者裕陵廷珪故墨王平甫  
藏為至寶矧是書耶抱烏號不若藏此筆保曲阜履不  
若傳此書太保公裝潢十襲可以知寵可以知世引忠

孝於無斃二字發也

跋李文正公絕筆卷

李文正公西涯書山鐫冢刻布在人世而流之海之內  
外篆書跨越百代人無異同者行草寄謹嚴於疎越運  
簡遠於郁穠而中峰筆正尤世所無蘓子瞻謂歐陽率  
更書如其貌公容美若粹玉韻調平遠清廟之歌磬書  
亦如其為人是卷公絕筆也猶耿耿然若不為造物誣  
克養可槩占矣嗚呼公壯子出也公老以化子入也器

之不齊型範異爾矣公孫塔都諫劉君濟出以示子相對隕涕噫其已矣

大禮正議跋

聖天子握乾承統新政釐革以復人心者此詔也尊號殆若未然夫有不易之理有難割之情壬辟舞扇固有以待之於先者矣元臣者身宗社之重揚公倡之蔣公毛公和之銅弊雄奸機發神應大禮受重所後不得復顧私親然所生之情自異楊公力主程朱濮議之說蔣

公毛公和之上俞之晦義疑情日星開朗合天心而副人意三公賀為幸而詆詞鼓妄國是為搖竟之沿襲濮故稱帝后三老申論至待罪家居費公既召至抗聲網常無取自異郊回清寧後官災上始大悟嗣是物數徒隆主祀猶闕癸未夏又欲有加四公不可上親灑宸翰御平臺召授臣廷和臣冕撰進人不可上心信而罷甚矣邪說之貢惑也非睿聖宏亮之主方貞秉禮之臣其不再誤鮮矣中間申議封還御批者四執奏者二十餘

傳諭開釋無筭楊公以水喻情隄喻禮尤為善喻它疏不可勝紀蔣公取而輯之前後二跋稽據周詳楊公屬某書其後夫隆所生皆衰世事書譏也魏元帝欲尊所生父不稱臣有司議不可噫可稱帝邪漢成既立定陶王為皇太子即立楚孝王孫景為定陶王以主國祀小宗之緒不可廢也論者謂預養宮中與外藩入繼為異噫人後均也無二統亦無二帝國之有帝未之前聞也加九錫舞八佾僭踰附有藉口可無慎與我祖宗家法

具在皇上神聖天啟殆將旣前違而亟後繼謹書以俟

詹丕遠二勅跋

左正言玉山詹公在宋徽朝疏蔡京誤國出知天雄軍  
所受二勅為賜天雄將領戍兵寒具及天寧壽表歸報  
例恩子孫傳寶殆御書手詔飛白無異賜衣賜帶故笏  
故斫不足歲者當時賜京殆不止是祖不敢認敢歲耶  
一時致力願為借譽無窮之地京之知未及此也公諱  
丕遠一十四世孫給諫泮出以示予具知其志書而歸

之

三朝恩命跋

李公梧山曾祖邑博公以祖起司諫進徵仕郎封如其  
官妣並配孺人勅凡四道宣德時也司諫公偕父玉傳  
公以梧山起中丞進通議大夫贈如其官妣并配并加  
淑人誥凡七道正德時也梧山再起官保司空兼中丞  
進資德大夫再贈祖若父如其官妣并配并加夫人誥  
凡七道嘉靖時也梧山珍問惟謹別錄黃為卷以昭上

恩夫天語下頌名家望姓有求之數十世不可得况四  
世十軸十八制未已耶本深而發以茂固然者自古褒  
異者儁必推原所始富鄭公曾祖制曰躬執義善貽乎  
曾孫祖制曰樂哲迪義祚流聞孫父制曰惠和敷大篤  
生碩人諸配疏封開號駿命有申攷往視今梧山藉長  
厚以樹方貞將匹休為烈以答主眷副朝望與知己一  
榮焉

鈍齋題辭

利與鈍什百萬遠矣水斷蛟龍陸刺犀象善劍也解  
牛十九年刃若新發於刑善刀也抑以芒缺亦有焉山  
澤之儒一刀數十年鋒刃俱去截紙若鋸文然亦無見  
其缺斯三者何居曰夫子第由參曰勇曰魯勇如所料  
魯之傳獨得其宗鈍殆有利哉陳文學問鈍於子子鈍  
者故告

何石川題辭

族諸弟雲東生記石川開合正變出入毛穎之間或病

其工古文詞不入時格予獨謂不數數是篇也石川何  
用明取義爾矣易艮為山為小石坎為水為溝瀆石非  
小白山則小溝瀆未可言大自濫觴則言大夫含澤布  
氣生生不窮土何以金哉土之精則石石故金金故水  
而陰陽成氣剛柔成質仁義成性未有不由焉者或曰  
石不可轉水殆可決之而東西故君子慎重

雪冤紀異跋

鄭殺伯有訛言鬼至人相驚或夢之曰余殺帶又殺段

帶段果卒鄭人愈驚子產立其子良止撫之而定子觀  
沈君子公紀小羊暴寃事殆信夫形入聲應皆人也而  
忽焉影滅亦異矣詢之異有顧影祥父子為弟所謀之  
事小羊其乳名也時方在鞠訊之而伏噫鬼有智矣夫  
知君名御史辨此也記兒時邑有吳姓者亦為族所謀  
暴寃尤異此直而彼不直有餘慨焉夫幽憂鬱邑上通  
于天其神氣未散見諸訴往往有之朱子謂怪不可謂  
無夫子不語定惑也

見素續集卷十一

欽定四庫全書卷

見素續集卷十二

明 林俊 撰

書傳贊說

寄少傅費東湖公

林野共覩太平執事首被新渥起殿師垣擠而下石者  
何在邪事惟無人爾矣寧之亂使皆如某沮其前如執  
事沮其後如汝華永清沮其中焉有此耶置之無足道

也陽明戲定神速古今奇男子矣古者君擇臣臣亦擇君茲遇主時也幸亟起以佐理唐虞然事在從容先甲後甲所以治蠱而已日乃孚所謂革也幸致之意某叨與起落又有不宜起者七旬病老班行無年似之人無同時之舊諸老無一識面而志頽學落力憊神疲何恃能起且強壯而歸耄老而出人其謂何今之任世道之重者九峯白巖之渾粹堅定幸庵之貞剛皆足共事某聽散野高逸者流君相固有處也由衷之言幸示調幹

母致再乞矯令弟繼起令姪繼及第由古似無自愛自愛

寄袁閣老

鄂城邂逅去今三十有餘年竟陵再會亦餘一紀矣縱浪林壑垂老復見太平新天子聖神文武元老之舊學長德更元一詔弊政釐革無遺奉天之詔書開元之雜報退然後矣當此弊極非此運斡收既離之人心奠將歌之神器幾不可為然亦須從容慎重母已甚為也易

蠱與革與夬與解有深意焉遺老起落聖明盛事僕謬  
在數中天語叮嚀引以共政速之以亟來朝拜恩而夕  
登途僕之心也第年力衰邁百疾交罹初心日負而艱  
直之故性猶存精神意慮非往時比矣聽耕鑿為聖世  
逸流備臯夔稷契中一巢許僕之分也君相盛舉為僕  
也為天下也僕亦欲為天下也欲為天下不足以副天  
下負君相負天下也伏望搜進碩賢同心輔政致聖主  
堯舜之上容僕卧病以遂本懷至祝至祝

簡宮傳毛三江公

昨又承盛設某眼孔中寧有此耶老出無所用竊意共  
理素風為訓儉一倡萬一士夫起而和之貴戚繼之內  
宦又繼之以聞諸聖天子以及內宮相率為儉其非小  
補也先生約質近道當羣奸用事獨立不回為吾道立  
幟豈於此未盡脫筒先生倡誰不和者不揆盡愚萬原  
責過吾人立已正君善俗外無它焉詩幸改削錄惠雨  
泥不及躬謝罪罪

寄翠庭弟

賢弟廉聲峻節重鄉邦而望在中外半歲三遷論者又欲引內臺當一面然名大者副亦大終吉以致其至又不獨鄉族之私也老兄數日三五疏決歸當宁明聖然事多牽制斯非素食之地進無所用委而退亦道當然况老如是耶弟力為之老兄副意如賓後一弟幸自副焉守仁有便錄此付之亦深望者近鄉族諸賢皆可應標亦族中一後行可愛可愛

寄陳靜齋都憲

書久缺序亦久逋逾七筋力官責已不可辦暇此耶照  
諒照諒太保劉文和公於某無半面成化間出位妄言  
甚荷提拂某得謫得還而公竟因某以去自是四十年  
無北生無謝死無吊徒深貯結若甚無情茲始得暇力  
執事遣奠以少致毋忘之私物誠薄意則誠厚也萬勿  
增品公泉下有靈亦諒子真也

寄少師楊石齋翁

某年過分淺入夏衰病逾加不謂高階厚廩若此忝竊也第七疏明復進恐主上見疑伏望調幹申此愚悃夫以主聖臣良之會適有志用世之期况老先生榜中祗某一人非誠不得已豈固如是數數然求去盖精力既已無堪骸骨亦須有地而去留兩事亦須互執其機以並張國勢獨振士風不謂留為得去為非得也且溫旨嘉褒使其愧忸無地何德堪此哉惟蚤賜一歸百凡遺恩俱無敢望無任悵祈不具

寄白巖喬冢宰

望之日潞河發舟日表天顏道容風範斯以遠亦斯以  
終別矣豈雲水一私之故斷割無已之情所望成聖而  
輔德者滋以熟矣卷和完錄上紙僅數葉且舟中搖曳  
書不能工南塢燕泉二公得善書各錄一本及惠寄一  
本自是美事九峯幸庵二翁復和慰憫九卿諸公會中  
幸道臆不具

寄燕泉何少宰

東郭艸堂無任難別強力自制執事巖翁泪盈出某  
安敢仰視哉幸翁泪至如雨哭有聲峰翁某不敢道別  
事亦不能使已也何修得此諸公哉仙郎大是奇器文  
無敢及命之微也幸改竄登卷或軸付能書或示雲莊  
書寄數日風甚順謹告

簡石齋翁

某迂僻荷君相曲全林壑再遂拜違顏範月再半途  
連雨無三二日晴臨清以北猶可濟以南水天相接土

屋官隄崩潰無幾夏已旱所恃者秋秋又澇黍菽蕎豆  
盡壞麥工種徒費民移丘阜小米石兩餘大米兩又半  
蘓常米亦兩餘今臘明春何恃為之悲梗成疾幸急有  
以處之莆素無盜近廣與鄰郡百三十至劫住月餘四  
處兵俱潰殺死五百人賊自幸無此好作賊地非久即  
來雲莊之席何怙命薄有此鄉人渴候回家不知無兵  
何以決勝欲增巡撫意若不增一風力兵備幸偕三大  
老先生暨吏兵一處大禮上聖舊德孝忠具在敬翁二

跋無遺矣不揆贅書付族子衢守有年覓便附上幸賜  
刪潤三老不顯書謝內翰中翰賢世契不及書餘惟體  
世道深念至祝

與朱郡伯三峯論備禦

昨仙人相見謂前尤溪賊八十餘寇永福虜人共約百  
人及從永春斜宅回抵數五十三人入尤中山而伏或  
謂散去一小半不知藏何山箐中或他路而去賊風時  
有不敢報恐厭報也夫銷鋒鎬弛武備秦所以亡而山

把隘堠傳箭城教兵皆宜先備所謂二百五十民兵者  
退老弱收精勇利兵器立教師皆宜先處李德裕在劍  
南率二百戶取一人習戰謂之雄邊子弟昨所謂五人  
者頗合人不謂之欠處也明示其下慎擇私教官有其  
名不必其來何授缺弊絕而人宜兵精而賊不南警所  
謂全取勝也不具

辭三峰存問儀物

承奉旨存問殊恩天殞感愧何勝嚮者辭多受少缺明

分亦見公之乏不自腴也而損以成禮又屢告矣顧滋以厚林下閒人歲役月米已過又歲時許多存問安乎夫優老之厚在文安公則可此則不可幸痛裁削為二三兩之費不傷惠亦不傷廉章公訓俗兩意具在無快耶如緘視入再處至祝

寄楊月湖宗伯

方尾請老于湖月庄雲之間而北問時至祚宋無是事矣區區自春有白濁病瘦削老醜有加先生因餘年以

究極程朱皇明道學始也達子文行頗進欲畢志林野  
任之適恃敏學顧落週一醇質而已方二孫近三子三  
姪皆有如熊之兆老年懸結在此也不具

寄汪石潭宗伯

久乏北報巷談途論莫知所適從林丘雖老敢忘人國  
一念哉既乃知有大議論正學直氣雄心壯節畢盡一  
時朝雲雷而夕烟水出處完局山斗吾流二疏遠矣哉  
抑明良之朝山間之席有不得暖者惟為道保愛萬萬

寄石少傅熊峰

自尾班行得遂懸結純正大君子內章外晦以師表名  
流銷縮羣穢相理太平深望焉治體靡常轉局勢異斯  
入有積誠感悟之幾焉國謀取上信身謀取心安聖意  
決回大禮決正吾人之作用不然石老去敬老去若礪  
老湖老又去先生又去何成朝廷噫斯師臣所以難處  
也誰是毒者學之偏其流禍乃是攻愈衆則立敵愈堅  
意理導之方決自愧去自不出亦難自留九廟在天朝

論僉合草野言無異聖心諒自追悔幸從容以答天休  
滋至必不然引去未晚某亟欲舉富鄭公林下故事恐  
涉猜疑抑未能終已也望先生言語文字間哉承惠二  
文相思時對自解自歸疾時作不能書地異亦不宜書  
也礪老湖老洎長院諸先生幸道勤臆并謝餘惟為國  
體世風寶愛萬萬

答何燕泉

自執事過南某四詩奉憶寄之京又寄之鄉想到矣盛

時清靜之地天為公謀也其任其止世道世風寓焉吾人一是外何求哉區區自去冬右半不遂筆不能把飲食俱待人然輕塵弱草亦不須繫也

寄周憲長

別久驚湖之會天也又居而近書惠再勤且辱下問迂腐無足告書亦以遲愧愧記童州時見藩臬諸公歎歎然受直急事是懼月正甫旬守巡臨部仲夏始回回復出在公廨日甚少故下無賊吏鄉無奸民寇賊有所憚

而不敢肆今之吏縱民頑盜日以起者反本之論執事  
得之素丁公得之過浙逮今詳焉政固在人長賢也既  
倡之諸寅案又賢也羣起而和之同心事事廉而勤法  
正而心近厚閩將不異于故風望所至合調而同聲又  
將不異于閩閩始也林屋漫愚不自知其不可朝覲地  
乏正官賊或動念幸檄屬操民兵嚴巡邏為閩倚命豐  
先生客寄涼落時煩臨慰平素無與人事賤子亦頗父  
風書來勿信餘惟多愛至祝

寄楊少傅邃菴翁

西陲猶棘元老載徵仗壯猷紆急難潞公之後恒少也  
卵橋魚鳥其不得私矣君相用人猶大匠之用木是任  
也要非常構可勝公勝此無難也經理邊防成則羣頌  
功一不成則獨當其怨然猶可也公名在四朝望實孚  
于中外公台舊席虛以待久矣天常國是決從違公也  
可回則入不可回則先幾長謝赤松完局公固辦此矣  
病廢強伸中曲今故人誰也惟萬萬加愛

與蔡霞山大叅

某好賢出其性自接顏論貯結十六年湖貴之滯嘗致  
不平語或不謂然福唐錢禁貴鄉徐正郎閩士夫亦不  
謂然蒞莆論亦起為賢者私惜焉夫山水祗可逸人退  
傳自適在官須矩度檢身心勤職業弊吏治恤民隱矧  
地高望懸尤屬瞻視今日宿書院明日宿僧舍分夜又  
遊木蘭無乃不可且當辦賊之時選兵鋒計糧餉且不  
暇暇及此邪民方窮竭僧租徭且不辦路亭無故罰蓋

非可已耶意亟撤止專理滅賊及分守本務以副人望  
近世相知舐蠟貌暗言取媚悅或巧因為利此語誰忠  
告耶幸照諒萬萬此賊須如簡公去歲會祝先生調漳  
泉海滄同安南安安溪永德等兵夾攻過莆仙則直追  
而來此兵不足辦也附告

寄楊邃庵

元樞載召潞公平章一時也宸眷愈隆則人望亦愈以  
重固自有處也然當仁聖之朝勤學思治之會得舊學

以膺上佐誠符意感晦庵西涯東山引而司馬溫國無  
難者夫道立之正運之和啓心沃心贊掖治理而收致  
名賢與以忠而獲罪者以裨上德副羣望回上天之意  
斯吾人之作用楊石翁才而密初頗相異比憂歸得諸  
鄉論書來頗悔相見又大悔且服焉亦大臣量也得舉  
自代陽明引西北總制則在野猶若在朝有尹之商休  
無仲之齊亂吾人心事可以白當時告諸來世矣交深  
言直勿罪

寄秦鳳山司徒

京師辱教愛別來又辱惠問末疾廢書謝愧愧弊郡大  
旱作苦歲五月不雨至十月未解禱無應廣渠深渠盡  
化平陸田禾枯死無復望井水一石市至七八文甚者  
十七八文掬泥漿以飲多病病多不救鄉偶得一線之  
泉羣起而爭至殺人無忌嗷嗷聚泣日計莫謀記弘治  
己未嘗饑藩司公帑尚富郡預備倉穀尚八萬石旁郡  
及廣尚熟鎮巡聞荒節發銀一萬六千兩輔備穀以濟

事聞孝宗又蠲租以盡旁郡及廣海賈穀四至不見甚  
荒今公私俱竭預備穀不滿二萬官無所濟鄰郡鄰省  
盡旱海賈路又絕無能民謀者且潮汀漳延流賊垂涎  
兵無足恃柰何柰何郡司災奏上幸極力回斡如例全  
免以活一方仍行鎮巡議處賑濟或割內帑之財布寬  
大之恩以廣我君相恤災之惠至祝

東濠翁

自公之出山中三致書想達矣位太高才猷太大跡太

竒望太重皇上堯舜之聖望公弼成堯舜之治百心焉  
羣邪害革國事日非名器日濫歲計日虛民日窮士風  
日以澆薄司府而下非魚肉其民則終日高卧終歲不  
巡歷視民如子官如家者幾人甚矣今之民之不幸也  
近江之南大旱蒲八月盡未雨井水石十餘錢北間又  
澇何景也嚮跪門者流跡疎而情可念處亦宜輕新入  
經綸莫大于是上下交德業成元臣晉接都俞盛事抱  
茲耿耿

傳

劉母葉一節傳

劉文斌甫妻葉氏字妙貞閩人宋節度使少蘊之後貞慎而習父伯賢母許氏擇以歸歸文斌文斌之劉為永嘉著姓自宋秀山尉以誠避兵入閩居南津三徙嵩山石井為石井人家故裕五世獨傳父處士回始生陽山分教文端與文斌二人分教不嗣卒文斌又獨食生瘞死賓祭之承與酬凡公私皆葉乎相政甫叙文斌不祿

孤元興四歲無期功強近為依官姓德鄰可胥為護庇  
儉狷伺釁以無利于劉葉深扁甘節里嫗無及見其面  
家之人與葉之叔季正色闔門不踰闕授事而退雨晨  
霜夜孤嫗相慰藉以須其長教事事繩引不渝孤竟立  
婦林婦梁婦陳及見孫曾之盛家循故以歿成化甲辰  
歲也壽七十六乙巳合文斌茶園以墓傳海江澄清洪  
五孫龍鳳鶴鵬鷺鷓六曾孫曾遠遠普玄孫翼翼清世  
揚也第進士選庶吉士為給事中有問學風節名元興

贈清官君子謂葉能節立有孤之報贊曰

家人關雎易詩具之矣啓國隆家女婦之化理丈夫為  
烈者也而樹孤垂慶矢死亮節劉之續絕葉一轉移間  
耳而匪石之心屹不可改乃家如故單族化而昌藩子  
以孫恩贈給事中為時宦姓葉節行並躋祀劉一節給  
事之父子為報者也傳以芳世云爾

贊

丁補齋贊

欽定四庫全書

見素續集  
卷十二

十五

丁補齋玉夫行古道未冠抗顏師席未室取進  
士與友皆長倍之賢予亦兄年以長質通理愧  
屈焉成化乙巳元日星變疏時事謫判遠州移  
倅郡再守州入為南儀制正郎擢副察使董學  
政南粵水禍甚酷孤同以他舟僅免予假力歸  
其喪述其傳以傳又二十年過潤同屬贊嗚呼  
贊乎哉贊曰

大雅弗作世風陸沉粵有斯人如玉如金考圖立象探

蹟索隱剗說浮辭痛茲一屏三聖微言四儒授受近述  
遠稽月將日就言階及禍一落後叔居貞委分造物為  
遊民寄量移士趨載屬有易其東惟壽孔促我生弗辰  
我成誰壞正色剛中以伏水恠

方思道祖靖惠贊

蓑烟釣父襖雨耕夫兒孫典則族里型模寵辱無關夷  
險不二有諸我山澤之姿垂厥後廟廊之器噫是謂棠  
陵之先方叔之裔

百歲翁贊有序

壽萬歲千歲臣子祝頌之辭伐毛洗髓神仙者流皆寓

言幻說為道大蠢鍾離人百十二歲洛中遺缺

六歲又不載致壽始末要之人生百歲為期缺 之誑

信有限為副固已鮮矣諸福以壽為首而本之缺 德

值世理亂又所謂遭也夫蒙難世缺轉而缺 長之運

故里荒涼林木春燕不能無寓目動心之感故壽貴於

德而又貴於遭予於崑山得周壽誼翁一人為今僉憲

君震五世祖生於宋長於元及見我國家載清中原之  
盛壽百十有六歲於倉州得毛閒翁公一人為今太子  
太傅宗伯公之祖生永樂長洪熙歷弘治以老壽百歲  
皆世極而錫老之榮昌後之福亦大概近之然周生世  
化之餘大物三易姓而始亨會寓目動心殆不能無也  
公少且壯且老于我六聖重熙累洽之朝親見孫宮傳  
公之大科顯秩子再被有恩命龍章下錫一處士而上  
卿易銜子同日又被贈今曾孫被殊廕皆世誠少翁慎

重持畏以隱名自終而義沮來奔祕不發又謹獨一事處之厚尤難者推見至隱毛之後宜有今公孫友某贊

曰

居貞處順抱素含真飲咽元氣為時逸民躡影競塵途軌紛錯退焉若歲以樂其獨孤遊遠蹈寥廓輕鴻山懷水臆箕頴之風德時福基高乃厚積孰是清門於焉以立龍章下錫白衣上卿族里生色墓木知名謂命維新謂物維故是為百歲之翁宗伯之父宮傳之祖

賈樂菴贊

南塢少宰父

樸質真風醇龐孤尚烟牧雪樵櫛衣蕙帳唐箕潁流晉  
羲皇上瓶無宿春甕有新釀酒隱神仙雲眠宰相窮以  
益堅老而不杖寄樂境於野情酬大官於私養跡也飄  
浮官曰漫浪感服紫以鞞金勞錫鳩而饋醬衛武高年  
山濤洪量是為九十五翁樂菴之像

件竹居贊

主事瑜父

巧以琢瑕迺礪若有璞有璞美在東噓面雲嘯以風有電流

迅雷蘊隆掇士魁聯朝籍維勤乃功損以益征不盈數  
常值計曹權政孚乃革未尋拱誰仆之心多世縮疾乃  
罹武之繩理所右謂生不辰既廼壽

楊直庵贊

太師文敏公孫正郎易父

黃山之陽舊相所鄉以似以續載引而長有美直庵風  
神皦厲帝曰汝賢職我外制天落之累留滯周南委心  
長謝箕頰之間叶皓首書淫強記博識翔售廣東秘府  
藏室遺聲遠調振響斯文拾遺有祖廣川有孫

周少叅子賢贊

長抱脩榦壯猶方格礪節擣詞浩矣七澤言潛斯鱗言  
舉斯翮雨沛雲歛茲山茲石

純齋汝錫贊

有瑋者器有清者神長身勁格體素含真瑟是徒工玉  
也弗售榮命甫新化及誰右曰維有子而又有孫繁祉  
崇慶萃茲德門

陳閒夫贊

正郎九川父

化速招尤棲卑負耻言賦歸來昨非今是許由一瓢元  
亮雙履息交絕遊大隱城市企嗣述於前良翼齊飛而  
並峙授子一經季也先第草野朝銜華門珂里教孝與  
忠為飛為止石表兮玉中綠衣兮黃裏樂伉儷兮期頤  
寄丹青兮形似訪靈跡兮桃源納真風兮松梓

說

世佩解

可吾仲子一蘭根植深而茅茁蚤備然其長燧燧然其

光清特秀發立百芳其下字取世化知化物而不知亦  
化於物蘭化不芳故有是說也為易世佩佩無過於蘭  
其芳擇也然曰一花曰葉侶薤而長根曰土斷續則叢  
生本也曰赤節紫莖高四五尺名蘭香草曰似澤蘭葉  
光潤陰小紫則榦生本也蘭易辨尚無定從况善無定  
在吾恐似者售而真者遺佩非所佩矣世言謝氏子弟  
如蘭恐世佩未北面屈平之蘭亦世佩所少也退之猗  
蘭操為夫子作也曰不採而佩於蘭何傷子如不傷我

不爾覲君子生不逢時其自守固如此世佩時矣擇而守可易乎作世佩解

何承矩訓

彬陽之何予及聞董學及識司刑兩少宰公及友少宰燕泉翁以及接承矩竊幸龜組之傳何尚之之世而文獻為優公曰何以教吾仲方甚哉泉翁之無已于予也方圓成象天主動以圓行也地主靜以方止也動則無息靜則有常有常斯無息致道不能易也夫方不能舍

矩猶圓之不能規故規矩方圓之至盡人之道作聖之  
要歸也吾人舍聖人何法哉漢律厯志規圓生矩而梓  
人斲圓必始於方方成而圓屬焉矩固所先事哉靜而  
正動而時是為內之方以為外之圓反是殆無取焉衛  
州吁好兵莊公弗禁石碣曰教子當以義方元次山作  
圓器其友謂曰吾聞惡圓之士寧方為皂不圓為卿柰  
何作圓器以悅孺子吾恐次山之日入于圓也翁之承  
矩命名固義方乎取抑亦惡圓乎寓承矩其自龔先世

之槩獲循而上以承夫子之不踰矩靜而正順利而動  
故曰直方大不習無不利而聖人定以中正仁義主靜  
圓亦有所不廢而卒主於方終身由之聖學所以成始  
而成終也何世學相成燕泉翁得李文正公日就所大  
承矩問道于予冰寒青出抑無害師也作承矩訓

夢竹字序

都尉京山侯崔公岱屏主方妊夢鳳止于庭化青牛意  
麟也若產犢然化老僧短榦醜貌鬚覆口言忘之矣占

者曰是無肩嗣之祥孔氏釋氏抱送者歟青牛老氏所  
乘壽徵者歟婉之夕夢大竹類鳳根若首榦葉若翹視  
之真鳳矣自西而來萬葉翔舞與鳳俱下止于屋占者  
曰是無清則神大則化西晉位崔所也萬葉子孫衆多  
之象者歟已而果男名鳳徵字以夢竹及是儀矩閑習  
學專而成可待業且冠以見于予及之子曰異哉禮春  
官以六夢占吉凶熊羆男子之祥而鳳麟又祥之大慧  
生聖麟趾興振振公子帝主固麟種也昔者崔陵兄弟

同日封拜稱二鳳連飛公兄弟殆然崔之鳳有種哉鳳  
文羽麟仁獸竹君子才德備特出等夷者也是而形又  
是而化夢竹先屬之矣抑驚驚不逮九齡石麟豈先於  
玉燕星精嶽氣鍾鉅人以樹勲伐現夢固多其不現夢  
者亦不為少君子脩其實以符其夢竹之大非樂材簡  
編材也發聖賢之蘊而系其跡得跡斯得蘊得蘊斯得  
心得心斯得性得性斯得節斯得時世有不假象而感  
不依形而立不隨世而遷虛則靈中則正堅則定與時

舒卷無處不宜竹之化將人中鳳麟東海之見五時之  
獲雖真胡取耶

見素續集卷十二